



**JUDISIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDISIAL**

***Komunikadu Imprensa***

**Periodu : Maiu 2011**

**Edisaun : 24 Maiu 2011**

**Parlamentu Nasionál Aprova Jeneralidade Esbosu Lei Prevensaun  
Brankamentu kapitais**

Parlamentu Nasionál iha loron 23 fulan Maiu 2011 aprova jeneralidade Projeitu Lei Númeru 18/II konabá Regime Jurídiku ba Prevensaun Brankamentu Kapitais no Finansiamentu Terorismu pasa ho votus afavor 33, kontra 1 no abstensaun 4. Projeitu lei ne'e propoin husi membru Komisaun C Estanislau da Silva husi Fretilin no hetan apoia asinatura husi membru komisaun C sira seluk inklui husi Prezidênte Komisaun C Manuel Tilman.

Diretór Interinu JSMP Casimiro dos Santos afirma katak: *estabelesementu Lei Rejime Jurídiku ba Prevensaun Brankamentu Kapitais no Finansiamentu Terorismu nu'udar pasu importante ida atu proteze infiltrasaun atividade kriminál ne'ebé bele afeita sistema finansiamentu Nasionál no global tanbá krimi sira ne'ebé mensiona iha esbosu lei refere nu'udar krimi ho kategoria krimi trans-Nasionál ka transnational crime ne'ebé afeita interese no estabilidade estadu hotu iha mundu rai klaran.*

Durante prosesu ba elaborasaun esbosu lei ne'e, Parlemantu Nasionál mós simu pareser ka vizaun husi Ministériu Públiku (MP), atu oinsa bele hametin diak liu tan projeitu refere. Tuir Ministériu Públiku katak krimi brankamentu kapatais no finansiamentu terorismu nu'udar forma krimi seriu ne'ebé sei afeita estabilidade no interese global, tanbá ne'e ejije kordenasaun no esforsu kolektiva atu prevene no kombate krimi relasionadu.

Aleinde subliña importansia husi prezensa esbosu lei refere, tuir Karta Oficial Prokuradóra Gerál da Repúblika (PGR) Dr. Ana Pessoa Pinto ba Parlamentu Nasionál deklara katak Kriasaun ba lei ne'e importante tebes atu reforsa Timór Léste nia pozisaun ne'ebé sai ona membru ba Grupu Asia-Pasífiku konabá Brankeamentu Kapitais/APG (The Asia/Pacific Group on Money Laundering) iha Jullu tinan 2008. Karta ofisial husi Ministériu Públiku mós subliña kestaun dezafiu interna Ministériu Públiku, partikularmente aleinde aspeitu kuadru legal, aspeitu rekursu umanus iha interna Ministériu Públiku nu'udar titular ba asaun penál iha enkuadramentu kriminál nian tenke hetan atensaun apropiadamente.

JSMP hanoin katak importante teb-tebes atu konsidera aspeitu rekursu umanus hanesan asepsitu xave ba implentasaun kuadru legál hotu iha kontestu enkuadramentu sistema judisiariu em-jeral. Mesmu JSMP konkorda ho Ministériu Públiku atu hametin kuadru legal sira ne'ebé sei mamuk

ka iha lakuna nia laran, maibe JSMP hanoin katak aspeitu rekursu umanus, tantu kualidade nomós kuantidade tenke hetan atensaun no konsiderasaun ne'ebé adekuada.

Durante intervensaun Ministériu Públiku nian, JSMP observa katak Ministériu Públiku mós tau iha preokupasaun konabá alinea 6 Artigu 313 Kódigu Penál ne'ebé tuir Ministériu Públiku sei impede punisaun ba ema sira ne'ebé prátika subjasente.

JSMP hanoin katak Parlamentu Nasionál presija tau konsiderasaun ba preokupasaun husi Ministériu Públiku relaciona ho artigu refere nune'e bele klarifika kestaun tekniku sira iha nivel implementasaun lei hirak ne'e.

Lei ne'e rasik baixa hikas fali ona ba Komisaun C asuntu Ekonomia, Finansas no Anti Korupsaun atu halo estudu komparativu no pareser ikus antes tama ba debate especialidade ho tempu semana ida.

Atu hetan informasaun kompleitu bele kontaktu direitamente :

Casimiro Dos Santos

Diretór Interinu JSMP

Email : [casmiro@jsmp.minihub.org](mailto:casmiro@jsmp.minihub.org)

Tlf: 3323883/7257466